

Na osnovu člana 147. Zakona o zdravstvenoj zaštiti Federacije Bosne i Hercegovine („Službene novine Federacije BiH", br. 46/2010 i 75/2013), kao i Pravilnika o postupku izdavanja Licenci i sadržini i izgledu Licence br. 82/13 koji je donio Federalni ministar, Skupština Komore medicinskih biohemičara Federacije Bosne i Hercegovine na svojoj Skupštini održanoj 17.06.2023. godine, donijela je ovaj

S T A T U T

KOMORE MEDICINSKIH BIOHEMIČARA FEDERACIJE BOSNE I HERCEGOVINE

I OPĆE ODREDBE

Član 1.

Komora medicinskih biohemičara Federacije Bosne i Hercegovine (u daljem tekstu Komora) je strukovna organizacija medicinskih biohemičara, sa licencom, koji rade na području Federacije Bosne i Hercegovine na poslovima zdravstvene zaštite ili na edukaciji medicinskih biohemičara, odnosno koji imaju prebivalište na području Federacije Bosne i Hercegovine u kojoj su udružene podružnice Komore Federacije Bosne i Hercegovine. Medicinski biohemičari su samo oni koji imaju Licencu (specijalisti medicinske biohemije, specijalisti medicinske biohemije i laboratorijske dijagnostike, magistri farmacije, magistri medicinske biohemije i doktori medicine koji rade na tim poslovima). Licenca Komore medicinskih biohemičara FBiH, ne može se izdati, niti se ista može produžiti zdravstvenim saradnicima.

Član 2.

(1) Naziv komore je:

KOMORA MEDICINSKIH BIOHEMIČARA FEDERACIJE BOSNE I HERCEGOVINE

Sjedište Komore je u Sarajevu, Zmaja od Bosne 8.

Član 3.

(1) Komora ima status pravne osobe.

(2) U pravnom prometu s trećim licem Komora istupa samostalno u svoje ime i za svoj račun.

(3) U pravnom prometu s trećim licem Komora za svoje obaveze odgovara svim svojim sredstvima.

Član 4.

Komora ima pečat okruglog oblika sa sljedećim tekstom: **KOMORA MEDICINSKIH BIOHEMIČARA FEDERACIJE BiH** na obodu sa znakom benzenskog prstena unutra.

Član 5.

Komora ima svoj amblem-benzenski prsten i svoj memorandum.

Komora će raditi na modernizaciji loga, kao i web stranice Komore medicinskih biohemičara FBiH.

Član 6.

- (1) Članovi Komore su svi zaposleni medicinski biohemičari na području Federacije Bosne i Hercegovine sa Licencom Komore medicinskih biohemičara FBiH, koji obavljaju poslove iz oblasti medicinsko biohemijske djelatnosti ili rade na edukaciji medicinskih biohemičara sa Licencom.
- (2) Članovi Komore mogu biti i medicinski biohemičari koji ne obavljaju poslove zdravstvene zaštite i to: nezaposleni medicinski biohemičari i penzionisani medicinski biohemičari sa Licencom Komore.

Član 7.

Komora štiti prava i zastupa interese medicinskih biohemičara sa Licencom Komore, unapređuje medicinsku biohemijsku djelatnost, brine se o ugledu medicinskog biohemičara i o pravilima obavljanja medicinsko-biohemijskog zvanja.

Član 8.

Komora obavlja sljedeću djelatnost:

1. Oblikuje etički kodeks medicinskih biohemičara.
2. Prati i nadzire provođenje pravila etike u biohemijskoj djelatnosti i poduzima odgovarajuće mjere u slučaju njihovog kršenja.
3. Vodi registraciju svojih članova transparentno.
4. Daje mišljenje ministarstvu zdravstva, odnosno kantonalnom ministarstvu o opravdanosti izdavanja, produživanja, ili oduzimanja odobrenja za obavljanje privatne prakse u biohemijsko-hematološkim laboratorijima.
5. Kod podnošenja zahtjeva ljekara za obavljanje privatne prakse koja uključuje biohemijsko-hematološku laboratoriju, daje mišljenje o potrebi, uvjetima i obimu njene djelatnosti.
6. Daje mišljenje o početku i prestanku rada zdravstvene ustanove koja se bavi laboratorijskom djelatnošću, a uzimajući u obzir utvrđenu mrežu zdravstvene djelatnosti, te stručne i ekonomske interese svojih članova.
7. Daje mišljenje za rad medicinskih biohemičara izvan punog radnog vremena u zdravstvenoj ustanovi ili kod zdravstvenih radnika koji obavljaju privatnu praksu.

8. Daje mišljenje na uvjete pod kojima medicinski biohemičar koji obavlja privatnu praksu može obavljati poslove svoje struke u zdravstvenoj ustanovi, a koje propisuje ministar zdravstva.
9. Daje mišljenje na cijenu laboratorijskih usluga privatnoj praksi koja ne ostvaruje prihode putem zavoda osiguranja.
10. Zastupa interese svojih članova kod sklapanja ugovora sa Federalnim zavodom osiguranja i reosiguranja, odnosno kantonalnim zavodom osiguranja i reosiguranja ili drugim osiguravajućim zavodima.
11. Pruža u drugom stepenu zaštitu građanima u ostvarivanju prava na kvalitet, sadržaj i vrstu zdravstvene usluge koja im se pruža.
12. Po službenoj dužnosti izdaje, obnavlja i oduzima odobrenje za samostalan rad svojih članova.
13. Sudjeluje pri utvrđivanju standarda i normativa zdravstvene zaštite.
14. Daje stručna mišljenja prilikom pripreme propisa od uticaja na razvoj zdravstvene struke.
15. Propisuje način oglašavanja i isticanja naziva privatne prakse.
16. Daje saglasnost za registraciju dijagnostičkih testova, reagensija, pribora i opreme.
17. Sarađuje sa zdravstvenom inspekcijom o provođenju zdravstveno-inspekcijskog nadzora.
18. Brine se o materijalnim i drugim interesima svojih članova.
19. Koordinira odnose među svojim članovima te aktivno sudjeluje u rješavanju eventualno nastalih sporova.
20. Obavlja i druge poslove u skladu sa Zakonom o zdravstvenoj zaštiti, Statutom i drugim općim aktima Komore.

Član 9.

(1) Prava članova Komore su:

- Pravo biranja tijela Komore i pravo da budu birani u tijelima imaju članovi Komore koji rade na neposrednim poslovima zdravstvene zaštite i u nastavi
- Pravo na usluge Komore koje proizilazi iz člana 8. ovog Statuta
- Pravo sudjelovanja na kongresima, seminarima i drugim stručnim manifestacijama koje su vezane za dijagnostičku djelatnost u Federaciji i inozemstvu

(2) Obaveze članova Komore su:

- Poštivanje svih propisa koje donose tijela Komore
- Redovno učestvovanje u radu svih tijela Komore
- Rad u ekspertnim ili radnim grupama Komore
- Redovno dostavljanje podataka koje prema svojim propisima traži Komora
- Redovno plaćanje članarine i ostalih davanja koje utvrdi Komora

Član 10.

Pravilnikom o izboru tijela Komore pobježe će se definisati način izbora za Skupštinu Komore, predsjednika, dopredsjednika i drugih tijela Komore.

II ORGANIZOVANJE KOMORE MEDICINSKIH BIOHEMIČARA FEDERACIJE BIH

Član 11.

Tijela Komore su:

1. Skupština
2. Predsjednik i dopredsjednik
3. Izvršni odbor
4. Kantonalne podružnice
5. Sud Komore
6. Tužitelj Komore
7. Komisija za medicinsku etiku
8. Komisija za stručna pitanja
9. Komisija za edukaciju
10. Komisija za statusna pitanja
11. Komisija za kontrolu kvaliteta rada i saradnju sa industrijom
12. Komisija za ekonomska pitanja

Član 12.

Mandat delegata Skupštine, predsjednika, dopredsjednika i članova tijela Komore traje četiri godine. Isti članovi Komore mogu biti ponovo birani za delegate Skupštine, predsjednika i dopredsjednika i članove tijela Komore.

Član 13.

U slučaju da se ne sazove Skupština Komore čiji mandat traje zbog izbora novih delegata Skupštine, predsjednika, dopredsjednika i članova tijela Komore, svi nastavljaju obavljati svoje funkcije do izbora novih delegata, odnosno članova tijela Komore, a najduže šest mjeseci po isteku mandata.

III SKUPŠTINA KOMORE

Član 14.

- (1) Skupština je najviše tijelo Komore.
- (2) Delegati Skupštine se delegiraju iz podružnica Komore. Svaki Kanton delegira po jednog delegata, obavezno bez obzira na broj med.biohemičara, a onda na svakih 7 zaposlenih

medicinskih biohemičara sa Licencom u svim podružnicama ide po 1 delegat. Kandidat za delagata može biti svaki član Komore u skladu sa članom 9. ovog Statuta.

Član 15.

Skupština obavlja sljedeće poslove:

- Donosi Statut komore
- Donosi Pravilnik o radu Komore
- Imenuje predsjednika i dopredsjednika Komore
- Imenuje i razrješava članove Izvršnog odbora Komore
- Imenuje i razrješava Sud Komore
- Imenuje i razrješava Tužitelja Komore
- Imenuje i razrješava predsjednike komisija Komore
- Ocjenjuje, raspravlja i donosi odluke o radu Izvršnog odbora Komore
- Odlučuje o povezivanju Komore sa drugim srodnim organizacijama
- Odlučuje o žalbama na odluke komisije, odnosno rješenja predsjednika Komore i Suda Komore
- Razmatra i zauzima stav o problematici koju rješavaju komisije
- Odlučuje o visini članarine
- Donosi i druge odluke iz djelokruga rada Komore

Član 16.

Za izvršenje svojih zadataka Skupština po potrebi osniva i druge stručne komisije.

Član 17.

- (1) Skupština se sastaje po potrebi, a najmanje jedanput godišnje. Sastanci se mogu organizirati i online.
- (2) Skupštinu saziva i pozive upućuje Predsjednik Skupštine na prijedlog Predsjednika Komore. Saziv skupštine je validan ako ima 2/3 kvorum, a odluka je validna ako je istu donijela natpolovična većina ili više od 50% prisutnih delegata.
- (3) Zahtjev za sazivanje Skupštine mogu Predsjedniku podnijeti i Izvršni odbor i kantonalni odbor.
- (4) Predsjednik Skupštine mora sazvati Skupštinu najkasnije u roku od 30 dana po primitku zahtjeva iz prethodnog stava.
- (5) Ukoliko Predsjednik Skupštine ne sazove Skupštinu u tom periodu, mogu je sazvati sami predlagatelji.

- (6) Skupština odlučuje većinom glasova od ukupnog broja prisutnih delagata ako ovim Statutom ili drugim aktima Komore nije propisana druga kvalificirana većina.

Član 18.

Rad Skupštine pobliže se uređuje Pravilnikom o radu Skupštine.

IV IZVRŠNI ODBOR

Član 19.

Izvršni odbor čine predsjednik, dopredsjednik, sekretar Komore, te predsjednici kantonalnih odbora.

Član 20.

Izvršni odbor obavlja sljedeće poslove:

- Izvršava zaključke Skupštine
- Priprema materijale, informacije, analize i prijedloge za Skupštinu
- Predlaže Skupštini imenovanje i razrješenje predsjednika Suda i Tužitelja Komore
- Imenuje članove komisija na prijedlog predsjednika komisija
- Po potrebi imenuje svoje ekspertne timove
- Izbira sekretara Komore
- Izbire savjetnike Komore
- Priprema i usklađuje rad komisija
- Priprema prijedloga promjene Statuta i drugih općih akata Komore
- Donosi pravilnike o radu komisija na prijedlog predsjednika komisija
- Obavlja izbor kandidata za radna mjesta utvrđena u Komori
- Rješava eventualne sporove između podružnica Komore
- Traži od medicinskih biohemičara privatne prakse putem kantonalnih odbora obavještenja i podatke koji se odnose na obavljanje njihovog rada
- Daje saglasnost na uvjete pod kojima medicinski biohemičar koji obavlja privatnu praksu može obavljati poslove iz svoje struke u zdravstvenoj ustanovi, a koje propisuje ministar zdravstva, na prijedlog Komisije za statusna pitanja
- Brine za pravnu pomoć svojim članovima
- Obavlja i druge poslove određene ovim Statutom ili drugim aktima Komore

Član 21.

Izvršni odbor donosi odluke i mora postojati 2/3 kvorum, a odluke su validne ako je iste donijela natpolovična većina ili više od 50% prisutnih delegata.

V PREDsjedNIK KOMORE

Član 22.

Predsjednik Komore bira se na Skupštini Komore tajnim glasanjem.

Član 23.

Predsjednika i dopredsjednika Komore bira Skupština, a način biranja pobliže se utvrđuje Pravilnikom o izboru tijela Komore.

Član 24.

Predsjednik Komore obavlja sljedeće poslove:

- Izvršava zaključke i odluke Skupštine
- Saziva i vodi sjednice Izvršnog odbora i provodi njegove zaključke i odluke
- Potpisuje ugovore koje sklapa Komora
- Učestvuje u radu komisija pod rednim brojem 9, 10, 11, 12 člana 11. ovog Statuta
- Izdaje rješenja na osnovu odluka koju donose tijela Komore osim rješenja i odluka Suda Komore
- Obavlja i druge poslove određene ovim Statutom ili općim aktima Komore, odnosno koje mu povjeri Skupština ili Izvršni odbor Komore

Član 25.

(1) Za obavljanje svog posla predsjednik i dopredsjednik Komore odgovaraju Skupštini Komore.

VI PODRUŽNICE KOMORE

Član 26.

Podružnice Komore su:

1. Podružnica Unsko-sanskog kantona sa sjedištem u Bihaću.
2. Podružnica Tuzlansko-podrinjskog kantona sa sjedištem u Tuzli.
3. Podružnica Zeničko-dobojskog kantona sa sjedištem u Zenici.
4. Podružnica Bosansko-podrinjskog kantona sa sjedištem u Goraždu.
5. Podružnica Srednjobosanskog kantona sa sjedištem u Travniku.
6. Podružnica Hercegovačko-neretvanskog kantona sa sjedištem u Mostaru.

7. Podružnica Zapadno-hercegovačkog kantona sa sjedištem u Širokom Brijegu.
8. Podružnica Sarajevskog kantona sa sjedištem u Sarajevu.
9. Podružnica Livanjskog kantona sa sjedištem u Livnu.
10. Podružnica Posavskog kantona sa sjedištem u Orašju

Član 27.

Podružnice Kantona biraju svoje kantonalne odbore.

Član 28.

- (1) Iz redova njihovih prisutnih članova kantonalnog odbora, bira se predsjednik podružnice. Predsjednik kantonalne podružnice saziva i predsjedava sjednicama kantonalnog odbora. Saziv je validan ako postoji 2/3 kvorum, a odluka je validna ako je istu donijela natpolovična većina ili više od 50% prisutnih delegata.
- (2) Kantonalni odbor sastaje se po potrebi, a najmanje četiri puta godišnje.
- (3) Kantonalni odbor donosi odluke većinom glasova od ukupnog broja članova.

Član 29.

Kantonalni odbor obavlja sljedeće poslove:

- Sudjeluje u provođenju zdravstvene politike svog kantona
- Učestvuje u organizovanju stručnih usavršavanja članova svog kantona, a u koordinaciji s Komisijom za edukaciju
- Razmatra primjedbe i prijedloge svojih članova i po potrebi ih prosljeđuje Izvršnom odboru Komore
- Predlaže Izvršnom odboru plan potreba medicinskih biohemičara kantona
- Redovno izvještava svoje članove o radu Komore
- Učestvuje u rješavanju eventualno nastalih sporova među članovima Podružnice
- Obavlja i druge poslove određene ovim Statutom ili općim aktima Komore, odnosno koje im povjeri Izvršni odbor Komore

VII SUD KOMORE

Član 30.

- (1) Sud Komore odlučuje o povredama dužnosti i ugleda zvanja medicinskih biohemičara.
- (2) Sud Komore radi u dva stepena.
- (3) Sud Komore u prvom stepenu ima predsjednika i dva člana.
- (4) Sud Komore u drugom stepenu ima predsjednika i dva člana.
- (5) Delegati u Skupštini ne mogu biti članovi Suda Komore.

Član 31.

Sud Komore u prvom i drugom stepenu radi prema Pravilniku o ponašanju i odgovornosti u struci.

VIII TUŽITELJ KOMORE

Član 32.

- (1) Tužitelj Komore predlaže i sudjeluje u postupku utvrđivanja krivice pri povredama dužnosti i ugleda medicinskih biohemičara.
- (2) Tužitelj ima dva zamjenika koje postavlja i razrješava Izvršni odbor Komore.
- (3) Tužitelj Komore radi prema Pravilniku o ponašanju i odgovornosti u struci.

IX KOMISIJA ZA MEDICINSKU ETIKU

Član 33.

- (1) Komisija za medicinsku etiku ima predsjednika i dva člana.
- (2) Članove Komisije bira predsjednik Komisije.
- (3) Način rada Komisije za medicinsku etiku uredit će se Pravilnikom o radu Komisija.

Član 34.

- (1) Komisija za medicinsku etiku obavlja sljedeće poslove:
 - Oblikuje etički kodeks medicinskih biohemičara
 - Prati i nadzire pravila etike u medicinsko-biohemijskoj djelatnosti i poduzima odgovarajuće mjere u slučaju njihovog kršenja
 - Razmatra prijedloge i problematiku kantonalnih odbora na njihov zahtjev
 - Obavlja i druge poslove koje im povjeri Skupština ili Izvršni odbor Komore

- (2) Za obavljanje poslova iz prethodnog stava, Komisija može imenovati stručnu, odnosno ekspertnu grupu.

X KOMISIJA ZA STRUČNA PITANJA

Član 35.

- (1) Komisija za stručna pitanja ima predsjednika, zamjenika i tri člana.
- (2) Članove komisije bira predsjednik komisije.
- (3) Način rada komisije utvrđuje se Pravilnikom o radu komisije.

Član 36.

- (1) Komisija za stručna pitanja obavlja sljedeće poslove:
 - Daje stručna mišljenja kod pripreme propisa od uticaja na razvoj zdravstvene nauke
 - Daje prijedlog plana potrebnih kadrova ministru zdravlja
 - Daje prijedlog mreže zdravstvene djelatnosti ministru zdravlja
 - Sudjeluje pri uvođenju standarda i normativa zdravstvenih usluga
 - Pruža u durgom stepenu zaštitu građanima u ostvarivanju prava s obzirom na kvalitet, sadržaj i vrstu zdravstvene usluge koja im se pruža
 - Saraduje sa zdravstvenom inspekcijom u provedbi zdravstveno-inspeksijskog nadzora
 - Obavlja nadzor nad stručnim radom članova Komore
 - Razmatra prijedloge i problematiku kantonalnih odbora na njihov zahtjev
 - Obavlja i druge poslove određene ovim Statutom ili drugim općim aktima Komore, odnosno koje im povjeri Skupština ili Izvršni odbor Komore
- (2) Za obavljanje poslova iz prethodnog stavka Komisija može imenovati stručnu, odnosno ekspertnu radnu grupu.

XI KOMISIJA ZA EDUKACIJU

Član 37.

- (1) Komisija za edukaciju ima predsjednika, zamjenika predsjednika i tri člana. Članove Komisije bira predsjednik Komisije.
- (2) Način rada Komisije za edukaciju uredit će se Pravilnikom o radu Komisije.

Član 38.

(1) Komisija za edukaciju obavlja sljedeće poslove:

- Organizira u saradnji sa zdravstvenim, naučno-obrazovanim institucijama i organizacijama edukaciju i dodatno usavršavanje medicinskih biohemičara
- Propisuje uvjete stručnog usavršavanja medicinskih biohemičara koji obavljaju privatnu praksu, a zbog proširenja djelatnosti
- Prati i analizira problematiku i brine se za usklađivanje razvoja medicinsko-biohemijske djelatnosti
- Provodi provjeru stručnosti medicinskih biohemičara
- Razmatra prijedloge i problematiku kantonalnih odbora na njihov zahtjev
- Obavlja i druge poslove određene ovim Statutom drugim općim aktima Komore, odnosno koje im povjeri Skupština ili Izvršni odbor

(2) Za obavljanje svojih poslova Komisija može imenovati stručnu, odnosno ekspertnu grupu.

Član 39.

(1) Način stručnog usavršavanja medicinskih biohemičara:

- Objavljivanje stručnih i naučnih radova, doktorskih radova i dizertacija
- Doktoralni studij
- Specijalizacija
- Sudjelovanje na organiziranim edukacijama po određenim stručnim temama
- Drugi oblici organiziranog stručnog usavršavanja kao što su studijski boravci i slično

(2) Komisija donosi Pravilnik o edukaciji medicinskih biohemičara.

XII KOMISIJA ZA STATUSNA PITANJA

Član 40.

(1) Komisija za statusna pitanja ima predsjednika, zamjenika i tri člana.

(2) Članove Komisije bira predsjednik Komisije.

(3) Komisija radi po Pravilniku o radu Komisije.

Član 41.

(1) Komisija radi sljedeće poslove:

- Vodi registar članova Komore
- Izdaje, obnavlja i oduzima odobrenje za samostalan rad medicinskih biohemičara prema propisima Komore (na prijedlog Komisije za edukaciju)
- Daje mišljenja Ministru zdravstva o opravdanosti izdavanja produživanja i oduzimanja odobrenja za obavljanje poslova medicinskih biohemičara u privatnoj praksi
- Daje mišljenja Ministru zdravlja o opravdanosti početka i prestanka rada zdravstvenih ustanova s obzirom na utvrđenu mrežu zdravstvene djelatnosti vodeći računa o stručnim i ekonomskim interesima svojih članova
- Vodi računa o bodovanju za produžetak Licence
- Daje mišljenja za rad medicinskih biohemičara u svojoj djelatnosti izvan punog radnog vremena:
 - a) U zdravstvenoj ustanovi
 - b) Kod zdravstvenih radnika koji obavljaju privatnu praksu
 - c) U vlastitom prostoru i s vlastitom medicinsko-tehničkom opremom
- Kod podnošenja zahtjeva ljekara za obavljanje privatne prakse koja uključuje biohemijsko-hematološku laboratoriju, daje mišljenje o potrebi, uvjetima i obimu te djelatnosti
- Zastupa interese svojih članova kod sklapanja ugovora sa zavodima zdravstvenog osiguranja i drugim osiguravajućim zavodima
- Propisuje način isticanja naziva i način oglašavanja privatne prakse
- Daje prijedlog Ministru zdravlja za donošenje rješenja o prestanku rada privatne prakse
- Razmatra prijedloge i problematiku kantonalnih odbora na njihov zahtjev
- Obavlja i druge poslove određene ovim Statutom i drugim općim aktima Komore, odnosno koje im povjeri Skupština ili Izvršni odbor Komore

(2) Za obavljanje svog posla Komisija može imenovati stručnu, odnosno ekspertnu grupu.

XIII KOMISIJA ZA KONTROLU KVALITETA I SARADNJU SA INDUSTRIJOM

Član 42.

- (1) Komisija za statusna pitanja ima predsjednika, zamjenika i tri člana.
- (2) Članove Komisije bira predsjednik Komisije.
- (3) Komisija radi po Pravilniku o radu Komisije

Za obavljanje svog posla Komisija može imenovati stručnu, odnosno ekspertnu grupu iz inozemstva.

XIV KOMISIJA ZA EKONOMSKA PITANJA

Član 43.

- (1) Komisija za ekonomska pitanja ima predsjednika i dva člana.
- (2) Članove Komisije bira predsjednik Komisije.
- (3) Način rada Komisije uređuje se Pravilnikom o radu Komisije.

Član 44.

- (1) Komisija za ekonomska pitanja obavlja sljedeće poslove:
 - Daje mišljenje na cijene zdravstvenih usluga za poslove koje obavljaju medicinski biohemičari koje određuje Zavod za zdravstveno osiguranje Federacije
 - Daje mišljenje za cijenu zdravstvenih usluga za privatnu praksu koja ne ostvaruje prihod putem Zavoda zdravstvenog osiguranja
 - Daje mišljenje na akta Zavoda za zdravstveno osiguranje kojim se utvrđuje način provođenja Plana i programa mjera zdravstvene zaštite, formiranje cijena i drugih osnova za sklapanje ugovora sa zdravstvenim ustanovama i privatnim zdravstvenim radnicima
 - Razmatra prijedloge i problematiku kantonalnih odbora na njihov zahtjev
 - Obavlja i druge poslove predviđene ovim Statutom ili drugim općim aktima Komore, odnosno koje im povjeri Skupština ili Izvršni odbor Komore
- (2) Za obavljanje svog posla Komisija može imenovati stručne odnosno ekspertne timove.

XV IZVORI FINANSIRANJA KOMORE

Član 45.

Izvori finansiranja Komore su:

- Članarina
- Naknade za usluge Komore
- Donacije
- Prihodi ostvareni organizovanjem stručnih sastanaka i edukacija
- Ostali izvori

XVI POSTUPAK IZDAVANJA, OBNAVLJANJA I ODUZIMANJA ODOBRENJA ZA SAMOSTALAN RAD

Postupak izdavanja odobrenja za samostalan rad

Član 46.

- (1) Federlno Ministarstvo Zdravstva dostavlja Komori izvještaj o svim kandidatima koji su položili specijalistički ispit za zvanje za zvanje specijaliste medicinske biohemije.
- (2) Izvještaj mora sadržavati sve podatke o kandidatima koji su položili stručni (državni) ispit.
- (3) Izvještaj iz prethodnog stava mora sadržavati sve podatke uvjerenja o položenom specijalističkom ispitu kao i prebivalište zaposlenog.

Član 47.

- (1) Medicinski biohemičar podnosi Komori zahtjev za izdavanje odobrenja za samostalan rad.
- (2) Zahtjev se podnosi nakon položenog stručnog ili specijalističkog ispita. Uz zahtjev je obavezno priložiti: diplomu završenog fakulteta, uvjerenje o položenom stručnom ili specijalističkom ispitu prema važećem Zakonu o zdravstvenoj zaštiti Federacije Bosne i Hercegovine i uvjerenje o državljanstvu.

Član 48.

Postupak za obnavljanje odobrenja za samostalan rad medicinskog biohemičara

- (1) Medicinski biohemičar je dužan stručno se usavršavati u skladu sa propisima stručnog usavršavanja Komore.
- (2) Medicinski biohemičar je dužan podnijeti zahtjev Komori za izdavanje produženja odobrenja za samostalan rad najkasnije 3 (tri) mjeseca prije isteka roka od dobivanja produženja odobrenja za samostalan rad, u skladu sa Zakonom o zdravstvenoj zaštiti Federacije Bosne i Hercegovine.
- (3) Uz zahtjev je potrebno priložiti dokaze o ispunjavanju uvjeta za produženje odobrenja za samostalan rad.

Član 49.

- (1) Komisija za statusna pitanja odlučuje o urednosti zahtjeva iz člana 51. ovog Statuta i prosljeđuje ga Komisiji za edukaciju koja će izvršiti provjeru stručnosti kandidata prema svom Pravilniku i dati svoje mišljenje Komisiji za statusna pitanja.
- (2) O urednosti zahtjeva mora se odlučiti u roku od 30 dana od dana primanja zahtjeva.

- (3) Ukoliko Komisija za statusna pitanja utvrdi da je zahtjev nepotpun dužna je pozvati podnosioca da podnese uredan zahtjev i to u roku koji ne može biti kraći od 15 a duži od 30 dana.
- (4) Ukoliko podnosilac ne izvrši svoje obaveze u određenom roku iz prethodnog stava, Komisija za statusna pitanja donosi odluku da mu se oduzme odobrenje za samostalan rad.

Član 50.

- (1) Ukoliko Komisija za statusna pitanja na osnovu prijeloga komisije za edukaciju utvrdi da kandidat ne zadovoljava uvjete za obnavljanje odobrenja za samostalan rad o tome mora izvijestiti Predsjednika Komore.
- (2) U izvještaju se mora tačno navesti u čemu kandidat ne ispunjava uvjete i obrazloženje Komisije za edukaciju.

Član 51.

- (1) Na osnovu odluke Komisije za statusna pitanja, a na prijedlog Komisije za edukaciju, predsjednik Komore donosi odobrenje za samostalan rad ili rješenje o oduzimanju odobrenja za samostalan rad.
- (2) Postupak za oduzimanje odobrenja za samostalan rad

Član 52.

- (1) Sud Komore u drugom stepenu donosi konačnu i pravosnažnu odluku o oduzimanju odobrenja za samostalan rad.

Član 53.

- (1) Ukoliko medicinski biohemičar izvan punog radnog vremena obavlja poslove zdravstvene zaštite u suprotnosti važećim članom Zakona o zdravstvenoj zaštiti Federacije Bosne i Hercegovine, Komisija za statusna pitanja donosi odluku da mu se oduzme odobrenje za samostalan rad.
- (2) Komisija mora donijeti odluku u roku od 30 dana od saznanja kršenja Zakona o zdravstvenoj zaštiti.
- (3) Prije donošenja odluke Komisija mora obavezno pozvati i saslušati medicinskog biohemičara protiv kojeg se odluka odnosi. Ukoliko se medicinski biohemičar ne odazove pozivu Komisije, Komisija donosi odluku iz stava 1. ovog člana.
- (4) Predsjednik Komisije za statusna pitanja svoju odluku prosljeđuje Sudu Komore.
- (5) Predsjednik Komore izdaje rješenje o odluci Suda Komore.

Član 54.

(1) Medicinskom biohemičaru može se obnovljati odobrenje za samostalan rad i nakon odlaska u penziju (mirovinu), u skladu sa Zakonom o radu Federacije Bosne i Hercegovine, a na prijedlog Skupštine Komore

Zaštita prava članova

Član 55.

Sve odluke, odnosno rješenja o ostvarivanju prava, obaveza i odgovornosti člana obavezno se u pismenom obliku dostavljaju članu s poukom o pravnom lijeku.

Član 56.

Član ima pravo prisustvovati sjednici Skupštine Komore na kojoj se raspravlja o njegovom ostvarivanju prava, obaveza i odgovornosti i izjasniti se o činjenicama koje su važne za donošenje odluke.

XVII MATERIJALNO-FINANSIJSKO POSLOVANJE KOMORE

Član 57.

Finansijsko-materijalno poslovanje vrši se prema zakonima o finansijsko-materijalnom poslovanju i prema drugim zakonskim propisima o društveno-pravnim licima.

Član 58.

Komisija za ekonomska pitanja donosi finansijski plan Komore, a usvaja ga Skupština Komore.

Član 59.

Za profesionalno vođenje marketinga i administrativno-stručnih poslova angažuje se sekretar Komore.

XVIII POSTUPAK ZA DONOŠENJE I IZMJENE STATUTA

Član 60.

Nacrt Statuta utvrđuje Skupština i daje ga na javnu raspravu po kantonalnim odborima. Rasprava o nacrtu ne može biti kraća od 30 dana.

Član 61.

Izvršni odbor Komore utvrđuje prijedlog Statuta.

Član 62.

Skupština Komore medicinskih biohemičara Federacije Bosne i Hercegovine donosi Statut Komore.

Član 63.

Promjene Statuta se vrše po postupku za njegovo donošenje. Inicijativu za promjenu Statuta može pokrenuti kantonalni odbor, Izvršni odbor Komore ili Skupština Komore.

XIX PRESTANAK RADA KOMORE

Član 64.

Komora prestaje raditi odlukom Skupštine ili Rješenjem nadležnog organa propisanim Zakonom. Odlukom Skupštine o prestanku rada Komore medicinskih biohemičara Federacije BiH određuje se i ko će o tome obavijestiti nadležne organe u Federaciji BiH.

XX STUPANJE NA SNAGU STATUTA

Član 65.

Ovaj Statut stupa na snagu dana xx.xx.xxxx. godine, kada je usvojen na Skupštini Komore medicinskih biohemičara Federacije Bosne i Hercegovine, a primjenjivati će se od dana upisa u registar društvenih organizacija kod Višeg Suda Federacije Bosne i Hercegovine.

Sarajevo, xx.xx.xx. godine.

PREDSJEDNIK KOMORE
MEDICINSKIH BIOHEMIČARA
FEDERACIJE BIH